



*Louange de Moyse, Iosué, Samuel, David, Salomon ; & des autres  
anciens Prophetes du vieil Testament.*

**S**I nostre Dieu seul Eternel est à magnifier pour la creation, decoration, & conseruation de cét Vniuers, nous auons vn pareil sujet de luy rendre graces eternelles, de ce que par le moyen des dons qu'il a departy à aucuns de ses seruiteurs & Prophetes, la memoire de ses hauts faits miraculeux a esté conseruée, & le sera parmy toutes les nations. Entre iceux le grand Legislatteur Moyse merite d'auoir le premier lieu, qui avec vn trauail incroyable, a non seulement conduit & reglé le peuple de Dieu apres la sortie d'Egypte au desert par plus de quarante ans, mais aussi a escrit tout ce qui s'est passé depuis la creation du monde iusques à son temps, ainsi que font foy les cinq liures par luy composez, de la Genese, de l'Exode, du Leuitique, des Nombres, & du Deuteronomie. Semblable honneur doit auoir son successeur Iosué, Iuge & conducteur des Israélites en la terre de promission, qui nous a laissé vn liure de ses exploits, & pareillement celuy qui a descrit l'histoire & les faits & entreprises des Roys de Iuda & d'Israël. Toutes les Eglises respandüe par le monde sont tenuë au Prophete & Roy David, pour la composition des Psalmes & Cantiques pleins de prieres ardentes, & de meditations Prophetiques. Son fils & successeur le Sage Roy Salomon a fait profiter le talent de la science & sagesse que Dieu luy auoit octroyée en nous laissant ses Cantiques, Prouerbes, & autres liures. Aussi nous deuous grandement honorer les bons Peres, Iob, Tobie, Daniel, Esdras, & les grands & petits Prophetes, des escrits desquels le vieil Testament est composé, & d'iceux la memoire est en benediction, & le sera iusques à la consommation des siecles.